



COMUNU DE SOLÈMINIS

Provìntzia de sa Sardìnnia de bàsciu

Bia Crèsia 18, 09040 – Solèminis (SU – Sud Sardìnnia)
Còdixi Fiscali (CF) 80005100922 - Partida Iva (PI) 01430300929

SA CARTA DE IDENTIDADI ELETRÒNICA (CIE) RELÀSCIU O ANNOAMENTU

(Primu Pàgina > Serbìtzius > Mòdulus e protzedimentus > Comenti fai po)

Sa Carta de Identidadi Eletrònica est sa mudàntzia de su bèciu documentu de identidadi de paperi.

Sa mannària est sa pròpia d-una carta de crèditu e si-ndi sìnnalat in su chi sighit:

- Est fata de policrabonau personalizau po mesu de sa tènnica de su laser “*engraving*” (= a tacas) cun sa fotu e is scedas de su tzitadinu e acumpangiada de is ainas de siguresa (olugramus, sfondus de siguresa, scriiduras piticas, “*guilloches*” [= arretrogus de linnias finis e grussas], e sighendi a nai;
- Tenit unu protzessori piticheddeddu a arràdiu frecuèntzia chi format una cumponenti eletrònica de amparu de is scedas anagràficas, de sa fotu e de sa marcadura de is didus de is manus de su titulari contras a dònna trastocadura;
- Est una aina pentzada a permiti sa cumbàlida in s’Arretza de parti de su tzitadinu, po ddu agiudai a si-ndi strallatzai intra is serbìtzius chi ndi bessint de is Pùbricas Aministratzionis;
- Est una aina po ndi arrennesci a pigai identidadis digitalis in su Sistema Pùbricu de Identidadi Digitali;
- Est una aina po ndi arrennesci a imperai is àterus serbìtzius a balori aciuntu, in Itàlia e in Europa.

Sa carta est cuntrassenniada de unu nùmeru seriali imprentau impitzus, in sa parti de ananti, a manu dereta, amostendi su formau afatanti: C (po ndi nai una: CA000000AA). Custu nùmeru seriali ddi nant nùmeru ùnicu natzionali.

Is scedas de su titulari càpias in su documentu funt:

- Su Comune chi lassat su documentu
- Su nòmini de su titulari
- Su sangunau de su titulari
- Su logu e sa dìi anca est nàsciu
- Su èssiri mascu o fèmina
- S'artària
- Sa tzitadinàntzia
- Sa màgini de sa firma de su titulari
- Sa balidura po su disterru
- Sa fotografia
- Is màginis de is duas marcaduras digitalis de is didus (unu de sa manu dereta e unu de sa manu de manca)
- Su nòmini e su sangunau de su babu e de sa mama (sincasu d-unu fillu piticheddu de edadi)
- Su còdixi fiscali
- Is càbidus de s'àutu de nàscida
- S'indiritzu de su bivimentu
- Su Comune de assentadura a s' AIRE (po is tzitadinus chi bivint in logu stràngiu)
- Su còdixi fiscali a bisura de còdixi a astiaxeddas

Sa carta de identidadi eletrònica est, prima de totu, unu documentu de arreconnoscimentu: cuncurrit a ndi aballorai, fora de sgarru, chini est diaderus su titulari in logu natzionali e siat in logu stràngiu, bogau s'avereguamentu de is marcaduras de is didus chi po ddas ligi tocat a tenni su permissu de su Ministeru de Aìnturu.

1. Su chi tocat a tenni po dda preguntai

Sa carta de identidadi eletrònica podit èssiri preguntada a su Comune anca si bivit e at a balli a segunda de is fàscias de edadi de appartenèntzia.

Andendi a spulghitai sa chistioni:

- tres annus po is pipiu prus piticheddus de tres annus;
- cincu annus po is piciocheddus intra is tres e is dexeotu annus;
- dexi annus po chini est intrau in edadi.

Dda podint preguntai:

- is tzitadinus italianus e stràngius e is tzitadinus assentaus a s'AIRE cun su passaportu o cun autudecrarazioni.

Su relàsciu de sa carta de identidadi eletrònica a is chi funt piticheddus de edadi previdit chi si depant presentai a is portaitus de s'anàgrafi comunali acumpangiaus de su babu o de sa mama cun d-unu documentu in cursu de balididadi, mentris po preguntai su relàsciu de su documentu bàlidu a is tentas de su si-nci si disterrai tocat a tenni s'acussentimentu de totu e duus e a si-nci acostai a s'anàgrafi impari cun su fillixeddu, po nai de eja e decrarai ca no nci funt barrancus a su disterru. Sincasu chi unu de is duus (babu o mama) est strobau, su chi si-nci acostat podit nai de eja, cumpilendi su mòdulu apòsitu impari cun sa fotocòpia de su documentu de identidadi suu.

2. Costus

Su costu de sa carta de identidadi eletrònica est de:

- Eurus bintiduus (€ 22,00), sincasu est su primu relàsciu o s'annoamentu a sa scadèntzia;
- Eurus bintiseti (€ 27,00), sincasu est su duplicau po fura, stramancamentu o sbisurimentu.

3. Normativa

Règiu Decretu dexeotu de làmpadas milli-noixentus-trintunu (18.6.1931), nùmeru setixentus-setantatres (n. 773): "Aprovatzioni de su Testu Ùnicu (T.U.) de is Leis de pùbrica siguresa";

Règiu Decretu ses de maju mili-noixentus-coranta (6.5.1940), nùmeru sescentus-trintacincu (n. 635): "Aprovatzioni de regulamentu po su faimentu de su Testu Ùnicu (T.U.) dexenoi de làmpadas milli-noixentus-trintunu (19.6.1931), nùmeru setixentus-setantatres (n. 773) de is Leis de pùbrica siguresa";

Decretu de su Presidenti de sa Repùbrica trinta de idas milli-noixentus-sessantacincu (30.12.1965), nùmeru milli-sescentus-cincuantases (n. 1656): "Normas aingiriu de sa tzircolazioni e aturamentu de is tzitadinus de is Stadius ainturu de sa Comunidadi Econòmica Europea (CEE)";

Lei bintunu de donniassanti milli-noixentus-sessantaseti (21.11.1967), nùmeru milli-centu-otantacincu (n. 1185): "Normas aingiriu de is passaportus";

Decretu de su Presidenti de sa Repùbrica ses austu milli-noixentus-setantacuàturu (6.8.1974), nùmeru sescentus-corantanoi (n. 649): "Disciplina po imperai sa carta de

identidadi e is àterus documentus de paris balori a su passaportu po is tentas de su disterru”;

Decretu de su Presidenti de sa Repùbrica bintotu de idas duamilla (D.P.R. 28.12.2000) nùmeru cuaturuxentus-corantacincu (n. 445): “Testu Ùnicu de is cumandus legislativus e regolamentàris in chistioni de documentatzioni aministrativa”;

Delibera de sa Giunta Comunale nùmeru sessantotu (n. 68) de su dexeotu de axrolas duamilla-dexeotu (18 luglio 2018): “CIE - Carta de identidadi eletrònica – Cumentzamentu carta de identidadi eletrònica noa - Determinatzioni costus de bessida”.

4. Documentus de presentai

Su tzitadinu si-nci at a depi acostai a su Comunu presentendi:

- **Sa fototèssera** chi at a depi èssiri de paperi o eletrònica, in d-una craixedda USB. Tocat chi sa fototèssera siat a sfundu biancu o luxenti, po s’assentadura digitali sua de mandai a su Ministeru.
- **Sa carta bècia o sa denùntzia de fura e stramancamentu:** s’interessau, in su mentris de sa pregunta depit presentai sa carta bècia o sa denùntzia de comenti si-dd’ant furada o dd’at stramancada, asinunca sa decraratzioni de comenti dd’at sbisuria amostendi su documentu etotu; capitendi chi s’interessau est fora de documentu perunu, sa protzedura informàtica permitit finas s’arriconnoscimentu cun duus tistimòngius mancai no funt de famillia.
- **Su còdixi fiscali o tèssera sanitària** a sa tenta de fai a lestru is fainas de assentadura.

Si ponit a craru ca is cartas de identidadis in paperi, giai tentas de is tzitadinus, ant a sighiri a èssiri bàlidas finas a candu no ant a scadiri.

Su tzitadinu, in su mentris de sa pregunta:

- Sincasu est su primu relàsciu, amostat a s’operatori comunali unu àteru documentu de identidadi in cursu de balidadi. Chi no ddu tenit, si at a depi presentai a su Comunu acumpangiau de duus tistimòngius;
- Sincasu est unu annoamentu o sbisurimentu de su documentu bèciu, ddu cunsènniat a s’operatori comunali;
- Cunsènniat a s’operatori comunali su còdixi fiscali;

- Cuntrollat impari cun s'operatori comunali is scedas anagràficas chi-ndi bessint de s'anàgrafi comunali;
- Inditat, a prexeri cosa sua, su logu e sa manera de si ddu fai sciri chi su documentu suu dd'ant mandau;
- Scioberat comenti arriciri su documentu (a si ddu cunsenniai a unu indiritzu scioberau de issu etotu o a si-nci acostai, issu etotu, a su Comunu po ddu arretirai);
- Amostat a s'operatori comunali sa fotografia;
- Pigat is marcaduras digitalis impari cun s'operatori comunali;
- Ponit sa firma sua in su mòdulu de arresùmini andendi a verificai, a s'acabu, is scedas.

Sa CIE no dda relàsciant luegus a su portalitu, ma dda mandant, a scioberu de su preguntadori, a su indiritzu suu (o a un'àteru recàpitu) o a s'ufitziu comunali incarrigau de dda relasciai, àinturu de ses giorronnadas de sa pregunta.

5. S'incarrigau

Ufitziu Anàgrafi – Bia Crèsia nùmeru dexeotu (n°18) – Pranu Terra

6. Cantu si stentant a dda fai

Ses giorronnadas a cumentzai de s'arricimentu de sa pregunta.

7. Annodaduras

a. Situatzionis stravanadas

Sa persona delegada si-nci at a podi acostai a ndi arretirai su documentu, bastit chi is generalidadis suas ddas nerit a s'operatori comunali candu si ddas domandant.

Sincasu su tzitadinu no si potzat acostai a su portalitu de su Comunu ca no nci podit bessiri de domu po maladia manna, unu delegau suu (po ndi nai una, unu de famiglia) si depit presentai a su Comunu a documentatzioni in is manus, chi amostat ca est strobau a si-nci acostai a su portalitu. Su delegau at a depi amostai sa carta de identidadi de su titulari o àteru documentu suu de arriconoscimentu, sa fotu sua e su logu innui mandai sa CEI. Fatu su pagamentu, si at a acordai impari cun s'operatori comunali po s'atobiai in su domitziliu de su titulari e acabai sa protzedura.

b. Disterru

Comenti po su documentu de paperi, sa CIE - chi balit a si disterrai - no amostat scriidura peruna; sa CIE - chi no balit a si disterrai - amostat sa scriidura: no balit a si disterrai.

Sa carta de identidadi no balit a si disterrai:

- a is stràngius;
- a is chi, sendi sotumitius, segundu sa lei, a sa pàtria potestadi o a sa potestadi amparadora, no tenint s'acussentimentu de chini dda esèrtzitat e, sincasu de intregu a àtera persona, s'acunsentimentu finas de custa; o, amanchendi, de s'autorizazioni de su giugi amparadori;
- a is chi depant scontai una cundanna restringidora de sa libertadi o ddus tochit a pagai una contravizioni o machìzia, bogau po custus ùrtimus su nullaosta de s'autoridadi chi depit curai su fai de sa sentèntzia, amìtiu chi sa contravizioni o sa machìzia funt stètias cambiadas in penas restringidoras de sa libertadi personali, o su cambiamentu insoru no cumportit una pena prus manna de mesis unu de presoni o duus de arrestu; is chi funt sotupostus a misura de siguresa tratennidora o a misura prevennidora comenti ndi bessit a pillu de is articulus tres e afatantis (artt. 3 e ss.) de sa Lei milli-cuaturuxentus-bintitres de su milli-noixentus-cincuantases (L. 1423/56).

§ § §